

# 福源石屋珙禅师语录(卷之下)

[元]至柔 编

## 山居诗

余山林多暇，瞌睡之余，偶成偈语自娱，纸墨少便，不欲纪之。云衲禅人请书，盖欲知我山中趣向。于是静思，随意走笔，不觉盈帙，故掩而归之。复嘱慎勿以此为歌咏之助，当须参意，则有激焉。

1

吾家住在雪溪西，水满天湖月满溪。  
未到尽惊山险峻，曾来方识路高低。  
蜗涎素壁粘枯壳，虎过新蹄印雨泥。  
闲闭柴门春昼永，青桐花发画胡啼。

2

柴门虽设未曾关，闲看幽禽自往还。  
尺壁易求千丈石，黄金难买一生闲。  
雪消晓嶂闻寒瀑，叶落秋林见远山。  
古柏烟消清昼永，是非不到白云间。

3

荒冢累累没野蒿，昔人未葬尽金腰。  
有求莫若无求好，进步何如退步高。  
贪饵金鳞终落釜，出笼云翮使冲霄。  
山翁不管红尘事，自种青麻织布袍。

4

纸窗竹屋槿篱笆，客到蒿汤便当茶。  
多见清贫长快乐，少闻浊富不骄奢。  
看经移案就明月，供佛簪瓶折野花。  
尽说上方兜率好，如何及得老僧家。

5

道在人弘孰可凭，发言须与行相应。  
贪心似海何时足，妄念如苗逐日增。

几树梅花清处士，一围芋子乐问僧。  
而今随例庵居者，见道忘山似不曾。

6

动则乖真静则差，非思量处更淆讹。  
无心未合祖师意，有念尽为烦恼魔。  
矮屋朝阳寒气少，疏篱种菊晚香多。  
白云曳曳方拖练，又被风吹过绿萝。

7

松下双扉冷不扁，一龕金像照青灯。  
眠云野鹿惊回梦，落涧猕猴堕折藤。  
得意看山山转好，无心合道道相应。  
多时不向门前去，藓叶苔花积几层。

8

三十余年住庵西，锄头旁事不吾欺。  
一园春色熟茶笋，数树秋风老栗梨。  
山顶月明长啸夜，水边云暖独行时。  
旧交多在名场里，竹户长开待阿谁。

9

翠宝丹崖列四傍，茅庵恰好在中央。  
一身布衲衣裳暖，百念消融岁月忘。  
石瘦种来蒲叶细，土深进出笋芽长。  
有时夜半闻钟磬，知有招提在下方。

10

莫谓山居便自由，年无一日不怀忧。  
竹边婆子长偷笋，麦里儿童故放牛。  
栗蠃地蚕伤菜甲，野猪山鼠食禾头。  
施为便有不如意，只得消归自己休。

11

庵住霞峰最上头，岩崖峻险少人游。  
担柴出市青苔滑，负米登山白汗流。  
口体无厌宜节俭，光阴有限莫贪求。  
老僧不是闲忒怛，只要诸人放下休。

12

啸月眠云二十年，自怜衰老见时艰。

鸟来索饭生台立，僧去化粮空钵还。  
虾蚬人争捞白水，锄锄我且断青山。  
黄精食尽松花在，不著闲愁方寸间。

13

幽居自与世相分，苔厚林深草木薰。  
山色雨晴常得见，市声朝暮罕曾闻。  
煮茶瓦灶烧黄叶，补衲岩台剪白云。  
人寿希逢年满百，利名何苦竞趋奔。

14

入得山来便学呆，寻常有口懒能开。  
他非莫与他分辩，自过应须自剪裁。  
瓦灶通红茶已熟，纸窗生白月初来。  
古今谁解轻浮世，独许严陵坐钓台。

15

溪浅泉清见石沙，屋头无角寄藤箩。  
夜深月下长猿啸，苔厚岩前少客过。  
庭竹欹斜春雪重，岭梅消瘦夜寒多。  
寥寥此道非今古，徒把砖来石上磨。

16

白发禅翁久住庵，衲衣风卷破褰毵。  
溪边扫叶供炉灶，霜后苦茅覆桔柑。  
本有天真非造化，现成公案不须参。  
豁开户牖当轩坐，尽日看山不下帘。

17

卧云深处不朝天，只在重岩野水边。  
竹榻梦回窗有月，砂锅粥熟灶无烟。  
万缘歇尽非除遣，一性圆明本自然。  
湛若虚空常不动，任他沧海变桑田。

18

岳顶禅房枕石台，白云飞去又飞来。  
门前瀑布悬空落，屋后山峦起浪堆。  
素壁淡描三世佛，瓦瓶香浸一枝梅。  
下方田地虽平坦，难及山家无点埃。

19

大道从来无盛衰，未明大道著便宜。  
圣贤隐伏当斯世，邪法流行在此时。  
痛策诸根休自纵，常存正念莫他为。  
人身一失袈裟下，万劫千生不复追。

20

破屋萧萧枕石台，柴门白日为谁开。  
名场成队挨身入，古路无人跨脚来。  
深夜雪寒唯火伴，五更霜冷只猿哀。  
袈裟零落难缝补，收卷云霞自剪裁。

21

人寿相分一百年，有谁能得百年全。  
危如茅草郎当屋，险似风波破漏船。  
流俗沙门真可惜，隐名师得更堪怜。  
寥寥世道今非昔，日把柴门紧闭关。

22

绿雾红霞竹径深，一庵终日冷沉沉。  
等闲放下便无事，著意看来还有心。  
古镜未磨含万象，洪钟才扣发圆音。  
本源自性天真佛，非色非空非古今。

23

优游静坐野僧家，饮啄随缘度岁华。  
翠竹黄花闲意思，白云流水淡生涯。  
石头莫认山中虎，弓影休疑盏里蛇。  
林下不知尘世事，夕阳长见送归鸦。

24

满头白发瘦棱层，日用生涯事事能。  
木臼秋分舂白术，竹筐春半晒朱藤。  
黄精就买山前客，紫菜长需海外僧。  
谁道新年七十七，开池栽藕种茭菱。

25

卜得重岩远市朝，柴门半掩草萧萧。  
是谁白发贫无诏，那个朱门富不骄。  
急债莫于宽里做，妄情须是静中消。  
白云也道青山好，夜夜飞来伴寂寥。

## 26

风樯来往塞官塘，站马如飞日夜忙。  
冒宠贪荣谋仕宦，贪生重利作经商。  
人间富贵一时乐，地狱辛酸万劫长。  
古往今来无药治，如何不早去修行。

## 27

入此门来学此宗，切须仔细要推穷。  
清虚体寂理犹在，忖度心忘境自空。  
树挂残云成片白，山衔落日半边红。  
是风动耶是幡动，不是幡兮不是风。

## 28

客爱幽闲到竹篱，逢仰应恕礼全亏。  
满头白发髻松聚，一顶袈裟撩乱披。  
黄叶火残终夜后，青猿声断五更时。  
拥衾相对蒲团坐，各自忘言契此机。

## 29

百岁光阴过隙驹，几人于此审思惟。  
已躬下事未明白，生死岸头真险峻。  
衲定线行娇妇泪，饭香玉粒老农脂。  
莫言施受无因果，因在果成终有时。

## 30

自入山来万虑澄，平怀一种任腾腾。  
庭前树色秋来减，槛外泉声雨后增。  
挑荠煮茶延野客，买盆移菊送邻僧。  
锦衣玉食公卿子，不及山僧有此情。

## 31

是身寿命若浮沤，只好挨排过了休。  
事欲称情常不足，人能退步便无忧。  
衰荣可逾花开落，聚散还同云去留。  
我已久忘尘事念，颓然终日倚岑楼。

## 32

自觉从前世念轻，老来任运乐闲情。  
芒鞋竹杖春三月，纸帐梅花梦五更。  
求佛求仙全妄想，无忧无虑即修行。  
松风昨夜炽然说，自是聋人不肯听。

## 33

逐日挨排过了休，明朝何必预先忧。  
死生老病难期约，富贵功名不久留。  
湖上朱门萦蔓草，涧边游径变荒丘。  
所言皆是目前事，只是无人肯转头。

## 34

白发头陀老病侵，住来茅屋几年深。  
消磨本有凡情执，析荡今从圣量心。  
百鸟不来山寂寂，万松长在碧沉沉。  
分明空劫那边事，一道神光自古今。

## 35

竞利奔名何足夸，清闲独许野僧家。  
心田不长无明草，觉苑长开智慧花。  
黄土坡边多蕨笋，青苔地上少尘沙。  
我年三十余来此，几度晴窗映落霞。

## 36

我本禅宗不会禅，甘休林下度余年。  
鹑衣百结通身挂，竹箴三条绕肚缠。  
山色溪光明祖意，鸟啼花笑悟机缘。  
有时独上台磐石，午夜无云月一天。

## 37

四十余年独隐居，不知尘世几荣枯。  
夜炉助暖烧松叶，午钵充饥摘野蔬。  
坐石看云闲意思，朝阳补衲静工夫。  
有人问我西来意，尽把家私说向渠。

## 38

蚕尾狼心满世间，争先各自使机关。  
百年能得几回笑，一日曾无顷刻间。  
车覆有谁知改辙，祸来无地著羞惭。  
老僧不是多饶舌，要与诸人揭盖缠。

## 39

鸟兔奔忙不暂停，岩居忽尔到颓龄。  
水边行道影偏瘦，松下看山眸转青。  
红叶旋收供瓦灶，黄花时采插铜瓶。

劳生好饮利名酒，昏醉无由唤得醒。

40

茅屋青山绿水边，往来年久自相便。  
数株红白桃李树，一片青黄菜麦田。  
竹榻夜移听雨坐，纸窗晴启看云眠。  
人生无出清闲好，得到清闲岂偶然。

41

古人为道入山中，日用工夫在己躬。  
添石堕腰舂白米，携锄带雨种青松。  
担泥拽石何妨道，运水搬柴好用功。  
体懒借衣求食者，莫来相伴老禅翁。

42

万物生成感宿根，己长彼短不须论。  
一团猛火利名路，三尺寒冰佛祖门。  
草莽荆榛狐窟宅，云霄蓬岛鹤乾坤。  
满头白发居岩谷，几度凭栏到日曛。

43

岩居我本为修行，不许人知每自评。  
道性淳和余习尽，觉心圆净照功成。  
种松锄菜一身健，补衲翻经两眼明。  
世异事殊真好笑，避秦亦得隐山名。

44

历遍乾坤没处寻，偶然得住此山林。  
茅庵高插云霄碧，藓迳斜过竹树深。  
人为利名惊宠辱，我因禅寂老光阴。  
苍松随石无人识，犹更将心去觅心。

45

年老心闲身亦闲，扫除一榻卧松间。  
岩扃幽寂自为喜，世路崎岖人转顽。  
风暖野禽声琐碎，日斜花药影阑珊。  
藜羹粟饭家常有，不用持盂更下山。

46

清晨汲水启柴门，看见天空四敛氛。  
黄独火香思懒爨，碧桃花谢悟灵云。

林间猿鹤惯曾见，世上衰荣杳不闻。  
几度坐来苔石暖，好山直看到斜曛。

47

白云深处结茅庐，随分生涯乐有余。  
未死且留煨芋火，息机何必绝交书。  
湛然凝寂通三际，廓尔圆明裹十虚。  
庵内不知庵外事，几番花落又还敷。

48

细把浮生物理推，输赢难定一盘棋。  
僧居青嶂闲方好，人在红尘老不知。  
风扬茶烟浮竹榻，水流花瓣落青池。  
如何三万六千日，不放身心静片时。

49

恁么彻底恁么去，放下从头放下来。  
两片唇皮堆白醭，一条古路长苍苔。  
云边木马飞如电，海底泥牛吼似雷。  
雪覆万峰晴月夜，暗香春信到寒梅。

50

清贫长乐道人家，日用头头自偶偕。  
昨夜西风吹古木，天明满地是干柴。  
霞飘素练粘丹壁，露滴真珠缀绿崖。  
活计从来随现定，不劳辛苦去安排。

51

了了常知似不知，悠然如兀又如痴。  
旋乾倒岳镇长静，一念万念终不移。  
有耳听声风过树，无心应物月临池。  
休言我独能明了，此事人人尽可为。

52

计拙渐亏应世才。聪明无分占痴呆。  
自言境物皆虚幻。谁解资财尽倘来。  
黄叶随流闲去住。白云横谷漫徘徊。  
双眸合却方才好。为爱青山又放开。

53、

圆颅方服作沙门，便见牟尼佛子孙。



止恶防非调意马，忘机息见制心猿。  
炼魔道性真金净，涵养灵源美玉温。  
把手牵他行不得，为人自肯乃方亲。

54

红日东升夜落西，黄昏钟了五更鸡。  
乾坤老我一头雪，岁月消磨百瓮齏。  
借地栽松将作栋，吃桃吐核又成蹊。  
寄言世上伤弓羽，好向深山择木栖。

55

法道寥寥不可模，一庵深隐是良图。  
门前养竹高遮屋，石上分泉直到厨。  
猿抱子来崖果熟，鹤移巢去涧松枯。  
禅边大有闲情绪，收拾干柴向地炉。

56

浮世光阴有几何，谁能拿拿又波波。  
厨空旋去寻黄独，衲破方思剪绿荷。  
鹿尾罢拈言语断，佛经忘看蠹鱼多。  
可怜身在袈裟下，趣境攀缘事似麻。

## 五言律诗

1

道人缘虑尽，触目是心光。何处碧桃谢，满溪流水香。  
草深蛇性悦，日暖蝶心狂。曾见樵翁说，云边窞昼房。

2

一镢足生涯，居山道者家。有功惟种竹，无暇莫栽花。  
水碓夜舂米，竹笼春焙茶。人间在何处，隐隐见桑麻。

3

时时自解颜，年老得安闲。心下浑无事，眼前惟有山。  
天空鹏翥翼，雾重豹添斑。独与梅花好，相期尽岁寒。

4

万缘休歇罢，一念绝中边。尽日闲闲地，长年坦坦然。  
山空云自在，天净月孤圆。磨炼工夫到，难同知解禅。

5

岩台舒野望，依约见松门。唐代高僧寺，宋朝丞相坟。  
溪光晴泻远，野色晚来昏。山路歌声绝，樵归烟火村。

6

屈曲黄泥路，团栾紫槿篱。纸窗开竹屋，瓦灶热松枝。  
平淡忘怀处，萧然绝照时。何人能似我，无事亦无为。

7

深山僧住处，端的胜蓬莱。地上并无草，园中却有梅。  
闲多诸想灭，静极自心开。一顶破禅衲，和云晒石台。

8

一阵从何起，飕飕偏九垓。撼他林木动，吹我竹门开。  
本自无形段，如何有去来。欲穷穷不到，一虎笑岩台。

9

霞雾山头顶，云边瞰小房。夏凉窗近竹，冬暖合朝阳。  
茧纸衣裳软，山田粥饭香。此生随分过，无可得思量。

10

一镢足生涯，长年饱水柴。有山堪寓目，无事可干怀。  
岚气湿茅屋，苔痕上土阶。任缘终省力，浑不用安排。

11

山厨修午供，泉白似银浆。羹熟笋鞭烂，饭炊粳米香。  
油煎清顶蕈，醋煮紫芽姜。百味皆难及，何须说上方。

12

真空如湛海，微动即成沍。才受形骸报，便怀衣食忧。  
识情奔野马，妄念走狂猴。不悟空王旨，轮回卒未休。

13

山家八月天，时物自相便。豆荚新垂垆，稻花香满田。  
割茅修旧屋，斫竹觅清泉。世上谁知我，优游乐晚年。

14

茅庵竹树间，尘世不相关。门对一池水，窗开四面山。

烟薰茶灶黑，麻蒸布裘斑。不悟空王法，缘何得此闲。

15

红日半衔山，柴门便掩关。绿蒲眠褥软，白木枕头弯。  
松月来先照，溪云出未还。迢迢清夜梦，不肯到人间。

16

扶杖出松林，间行上翠岑。鹤群冲鹢散，树影落溪沉。  
野果棘难采，药苗香易寻。淡烟斜日暮，红叶半岩阴。

17

好山千万叠，屋占最高层。减塑三尊佛，长明一盏灯。  
钟敲寒夜月，茶煮石池冰。客问西来意，惟言我不能。

18

取舍与行藏，人生各有方。乾坤容我懒，名利使他忙。  
背日鸥眠埠，营窠燕绕梁。情迷随物转，不得悟空王。

19

结草便为庵，年年用覆苫。纸窗松叶暗，竹屋藓花粘。  
麦饭惟烧火，藜羹不点盐。生涯随分过，谁管世人嫌。

## 七言绝句

1

凄凄茅舍新秋夜，白豆花开络纬啼。  
山月如银牵老叟，闲行不觉过峰西。

2

满山笋蕨满园茶，一树红花间白花。  
大抵四时春最好，就中犹好是山家。

3

有人问我何年住，坐久才方省得来。  
门外碧桃亲手种，春光二十度花开。

4

厌愤劳役爱安闲，个样如何居得山。

百丈以前岩穴士，生涯全在斲头边。

5

年老庵居养病身，日高犹自未开门。  
怕寒起坐烧松火，一曲樵歌隔坞闻。

6

童子未曾归动火，水云早已到投斋。  
山庵喜免征徭虑，腾种青松只卖柴。

7

玉堂银烛笙歌夜，金谷罗帏富贵家。  
怎似道人茅屋下，一天晴日晒梅花。

8

相逢尽说世途难，自向庵中讨不安。  
除却渊明赋归去，更无一个肯休官。

9

山厨寂寂断炊烟，冻锁泉声欲雪天。  
面壁老僧无定力，又思乞食到人间。

10

种了冬瓜便种茄，劳形苦骨做生涯。  
众人苦要厨房好，须是园头常在家。

11

粥去饭来何日了，日生日落几时休。  
都来与我无干涉，空起许多闲念头。

12

屋后青松八九树，门前紫芋两三岭。  
山居道者机关少，家火从头说向人。

13

此事谁人敢强为，除非知有莫能知。  
分明月在梅花上，看到梅花早已迟。

14

过去事已过去了，未来不必预思量。  
只今便道即今句，梅子熟时栀子香。

15

一日打眠三五度，也消不得许多闲。  
循环数遍琅干竹，又出青松望远山。

16

攀缘起倒易消停，卒急难除是爱憎。  
我笑青山高突兀，青山嫌我瘦棱层。

17

真空湛寂惟常在，不觉良田妄所朦。  
真性何曾离妄有，花开花落自春风。

18

天湖水湛琉璃碧，霞雾山团锦嶂红。  
触目本来成现事，何须叉手问禅翁。

19

年老气衰真个懒，晨朝更不见和南。  
客来无语相抵对，辛苦空劳到草庵。

20

老去一身都是懒，闲来百念尽成灰。  
与兄相见略弹指，无奈人情强接陪。

21

田地无尘长不扫，柴门有客扣方开。  
雪晴斜月侵檐冷，梅影一枝窗上来。

22

茅屋低低三两间，团团环绕尽青山。  
竹床不许闲云宿，日未斜时便掩关。

23

禅兄何事到烟萝，老我生涯苦不多。  
岩下木樨香满树，园中菜甲绿成窝。

24

一片无尘新雨地，半边有藓古时松。  
目前景物人皆见，取用谁知各不同。

25

万境万机俱寢息，一知一见尽消融。  
闲闲两耳全无用，坐到晨鸡与暮钟。

26

岩房终日寂寥寥，世念何曾有一毫。  
虽著衣裳吃粥饭，恰如死了未曾烧。

27

新缝纸被烘来暖，一觉安眠到五更。  
闻得上方钟鼓动，又添一日在浮生。

28

门前枯木似人立，屋后好山如浪堆。  
老我为人无可说，高高云路瞻兄来。

29

山形凹凸路高低，石占云头屋占蹊。  
地窄栽来蔬菜少，又营小圃在桥西。

30

百千日月闲中度，八万尘劳静处消。  
绿水光中山影转，红炉焰上雪花飘。

31

西方有路不肯去，地狱无门斗要过。  
金阁银台仙子小，镬汤炉炭罪人多。

32

著意求真真转远，疑心断妄妄犹多。  
道人一种平怀处，月在清天影在波。

33

要求作佛真个易，唯断妄心真个难。  
几度霜天明月夜，坐来觉得五更寒。

34

万缘脱去心无事，诸有空来性坦然。  
几度夜窗虚吐白，月和流水到门前。

35

一事无心万事休，也无欢喜也无忧。  
无心莫谓便无事，尚有无心个念头。

36

于事无心风过树，于心无事月行空。  
风声月色消磨尽，去却一重还一重。

37

新年头了旧年尾，明日四兮今日三。  
道业未成空白首，大千无处著羞惭。

38

白发催人瘦人肩，住来茅屋已多年。  
裙无腰带裤无口，一领褊衫没半边。

39

一轴楞伽看未周，夕阳斜影水东流。  
云归自就茅檐宿，一日光阴又早休。

40

茅檐雨过日头红，瞬间阴晴便不同。  
况是死生呼吸事，黄昏难保听朝钟。

41

明明见了非他见，了了常知无别知。  
记得去秋烟雨里，猿来偷去一只梨。

42

半窗松影半窗月，一个蒲团一个僧。  
盘膝坐来中夜后，飞蛾扑灭佛前灯。

43

长年心里浑无事，每日庵中乐有余。  
饭罢浓煎茶吃了，池边坐石数游鱼。

44

饭炊五合陈黄米，羹煮数茎青荠苗。  
淡薄自然滋味好，何须更要著姜椒。

45

移家深入乱峰西，烟树重重隔远溪。

年老心闲贪睡稳，厌闻钟响与鸡啼。

46

山风吹破故窗纸，片片雪花飞入来。  
添尽布裘浑不暖，拾枯深拨地炉灰。

47

半窗斜日冷生光，破衲蒙头坐竹床。  
枯叶满炉烧焰火，不知屋上有寒霜。

48

几树山花红灼灼，一池春水绿漪漪。  
衲僧若具超宗眼，不待无情为发机。

49

云未归时便掩扃，柴床眠稳思冥冥。  
山家不养鸡和犬，日到茅檐梦未醒。

50

粥去饭来茶吃了，开窗独坐看青山。  
细推百亿阎浮界，白日无人似我闲。

51

黑雾浓云拨不开，忽然去了忽然来。  
任他伎俩自磨灭，红日依前照石台。

52

一天红日晓东南，自拔青苗插瘦田。  
布襖半沾泥水湿，归来脱晒竹房前。

53

吃桃吐核核成树，树大花开又结桃。  
春去秋来知几度，怎教我不白头毛。

54

茅屋方方一丈悭，四檐松竹四围山。  
老僧自住尚狭窄，那许云来借半间。

55

临机切莫避刀枪，拼死和他战一场。  
打得赵州关子破，大千无处不归降。



56

有限光阴一百年，几人得到百年全。  
纵饶百岁终归死，只是相分后与前。

57

一大藏经闲故纸，一千七百葛藤窝。  
谁能去讨他分晓，起个念头犹是多。

58

溪边黄叶水去住，岭上白云风往来。  
怎似老僧常不动，长年无事坐岩台。

59

霞雾山高路又遥，庵居从简箴三条。  
却嫌住处太危险，落赚多人登陡劳。

60

老觉形枯气力衰。客来勉强出支陪。  
自怜不解藏踪迹。松食荷衣忆大梅。

61

道人屋冷四檐竹，长者门高百尺墙。  
屋冷道人心愈静，门高长者日多忙。

62

尽道凡心非佛性，我言佛性即凡心。  
工夫只怕无人做，铁杵磨教作线针。

63

南北东西去复还，陆行车马水行船。  
利名门路如天远，走杀世间人万千。

64

居山那得有工夫，种了冬瓜便种瓢。  
设使一毫功不及，许多田地尽荒芜。

65

离众多年无坐具，入山长久没袈裟。  
单单有个铁镢子，留待人来煮瀑花。

66

布衣破绽种青麻，粮食无时刈早禾。  
辛苦做来牵补过，复身免得报檀那。

67

饭香麦麸和松粉，菜好藤花杂笋鞭。  
我已尽形无别念，任他作佛与生天。

68

山居活计锄头边，衣食须营岂自然。  
种稻下田泥没膝，卖柴出市担磨肩。

69

锄头添铁屋头悬，健即锄云倦即眠。  
红日正中黄独熟，甘香不在火炉边。

70

团团一个尖头屋，外面谁知里面宽。  
世界大千都著了，尚余闲地放蒲团。

71

草庵盘结长松下，面面轩窗尽豁开。  
目对青山终日坐，更无一事上心来。

72

深秋时节雨霏霏，薜叶层层印虎蹄。  
一夜西风吹不住，晓来黄叶与阶齐。

73

团团红日上青山，竹屋柴门尚闭关。  
白发老僧眠未起，劳生磨蚁正循环。

74

山舍清幽绝点尘，心闭与世自相分。  
不知何处碧桃放，幽鸟衔来绕竹门。

75

老来无事可千怀，竹榻高眠日枕斜。  
梦里不知谁是我，觉来新月到梅花。

76

禅余高诵寒山偈，饭后浓煎谷雨茶。  
尚有闲情无著处，携篮过岭采藤花。

77

僧因产业致差科，官府勾追耻辱多。  
我有山田三亩半，尽情回付与檀那。

78

楮阁安炉种炭团，床铺新荐被新棉。  
一冬暖活如何说，梦想不思兜率天。

79

去年家火缺支持，家火今年用不亏。  
田里多收三斗谷，门前添得一方池。

80

白云影里尖头屋，黄叶堆头折脚铛。  
漏箬篱捞无米饭，破砂盆捣烂生姜。

81

修行岂得不成佛，水滴年深石也穿。  
不是顽皮钻不破，惟人只欠自心坚。

82

独坐穷心寂杳冥，个中无法可当情。  
西风吹尽拥门叶，留得空阶与月明。

83

玉蝶梅花香满树，水池洗菜绿浮科。  
锦衣公子如知得，定是移家入薜萝。

84

逆顺未曾忘此道，穷通一味信前缘。  
是他了达虚空性，不动纤毫本自然。

85

寒披荷叶衣裳暖，饥食松花饼饵香。  
不比世人营口体，奔南走北一生忙。

86

新缝纸被暖烘烘，黄叶堆头火正红。

闲梦不知谁唤醒，五更听得下方钟。

87

旋斫青柴逐把挑，担头防脱莫过腰。  
今朝未保来朝日，且了寒烟一夜烧。

88

今年难测是寒暄，一日阴晴变几番。  
檐下纸窗干又湿，门前石径湿还干。

89

峰顶团团尽是松，茅庐著在树荫中，  
天风一阵来何处，吹起波涛响半空。

90

黄罗直裰紫伽梨，出入侯门得意时。  
争似道人忘宠辱，松针柳线补荷衣。

91

春归暑退一秋凉，日晷如梭夜渐长。  
尽把工夫闲杂话，几曾回首暂思量。

92

我见时人日夜忙，广营屋宅置田庄。  
到头一事将不去，独有骷髅葬北邙。

93

个个闻知有死生，闻知何不早修行。  
堂堂大道无人到，开眼明明入火坑。

94

尽说修行不在迟，今生还有后生期。  
三涂一报五千劫，出得头来是几时。

## 歌

1

山名霞幕泉天湖，卜居记得壬子初。山头有块台磐石，宛如出水青芙蕖。更有天湖一泉水，先天至今何曾枯。就泉结屋疑终老，田地一点红尘无。外面规模

似狭窄，中间取用能宽舒。碧纱如烟隔金像，雕磬沉水凌天衢。蒲团禅椅列左右，香钟云板鸣朝哺。瓷罍土种吉祥草，石盆水养龙湫蒲。饭香粥滑山田米，瓜甜菜嫩家园蔬。得失是非都放却，经行坐卧无相拘。有时把柄白麈拂，有时持串乌木珠。有时欢喜身舞蹈，有时默坐嘴噜嘟。懒举西来祖意，说甚东鲁诗书。自亦不知是凡是圣，他岂能识是牛是驴。客来未暇陪说话，拾枯先去烧茶炉。红香旖旎，春花开敷。清荫繁茂，夏木翳如。岩桂风前唤回山谷，梅花雪里清杀林逋。人间无此真乐，山中有甚凶虞。也不乐他轻舆高盖。也不乐他率众匡徒。也不乐他西方极乐，也不乐他天上净居。心下常无不足，目前闲事有余。夜籁合乐，晓天升乌。戏鱼翻跃，好鸟相呼。路通玄以幽远，境超世而清虚。骚人尽思吟不成句，丹青极巧画不成图。独有渊明可起予，解道吾亦爱吾庐。山中居，没闲时。无人会，惟自知。绕山驱竹觅寒水，击石取火延朝炊。香粳旋舂柴旋斫，砂锅未滚涎先垂。开畚未及种紫芋，锄地更要栽黄芪。白日不得手脚住，黄昏未到神思疲。归来洗足床上睡，困重不知山月移。隔林幽鸟忽唤醒，一团红日悬松枝。今日明日也如是，来年后年还如斯。春草离离，夏木葳葳。秋云片片，冬雪霏霏。虚空落地须弥碎，三世如来脱垢衣。

2

晴明无争登霞峰，伸眉望极开心胸。太湖万顷白潋潋，洞庭两点青蒙蒙。初疑仙子始绾角，碧纱帽子参差笼。又疑天女来献花，玉盘捧出双芙蓉。明知此境俱幻妄，对此悠然心未终。徘徊不忍便归去，夕阳又转山头松。

3

干鹊傍檐鸣鹊暗，乌鸦绕屋声呀哑。西庵道者来送果，东邻稚子去偷瓜。吉凶占相既有验，罪福果报应无差。道人若有此见解，青铜镜面生痕瑕。懒融一见四祖后，百鸟更不来衔花。

4

林木长新叶，绕屋清荫多。深草没尘迹，隔山听樵歌。自耕还自种，侧笠披青蓑。好雨及时来，活我新栽禾。游目周宇宙，物物皆消磨。既善解空理，不乐还如何。

5

寒山曾有言，吾心似秋月。我亦曾有言，吾心胜秋月。秋月非不明，有圆复有缺。安得如我心，圆明常皎洁。有问心如何，教我如何说。

6

月来照我门，风来吹我襟。劝君石上坐，听我山中吟。玄发化为雪，朝光成夕阴。万事草头露，岂得长如今。

7

饭饱抱石睡，睡足起闲行。霭霭孟夏景，新树鸣黄莺。俯仰玩时物，散诞畅

吟情。只此是真乐，何必求虚名。

8

小不读佛书，大不识玄旨。焉知百万门，只在方寸里。终日恣贪嗔，几时念生死。一朝老病来，懊恼亦徒尔。

9

种豆两三畦，离离覆原上。不知阳和功，惟言土力壮。老兔伏崖根，心心欲希望。果能息汝贪，我宁不食酱。

10

山中一雨滋，原上百物好。手种三亩薯，亦可延昏早。咄哉世间人，名利常关抱。头上雪纷纷，胸中尘浩浩。

11

结屋荒山颠，随缘度朝夕。卖柴粿米归，煮粥做饭吃。虽是劳形骸，且免当户役。说妙与谈玄，个却晓不得。

12

放下全放下，佛也莫要做。动念即成魔，开口便招祸。饮啄但随缘，只么闲闲过。执法去修行，牵牛来拽磨。

13

破屋三二椽，住在千峰上。云散天空清，放目聊四望。世界空里花，起灭皆虚妄。日落山风寒，闭门烧火向。

14

结屋霞峰头，耕锄供日课。山田六七丘，道人三两个。开池放月来，卖柴粿米过。老子少机关，家私都说破。

15

两个穷道人，三间敝漏屋。开得一丘田，收得半担谷。煮粥仅有余，做饭却不足。也胜利名人，奔南又走北。

## 偈赞

示众偈

说是说非何日了，无明海阔我山高。  
修身如未清三惑，凡事须当灭一毫。  
闲静光阴空过了，现成粥饭若为消。  
殷勤说向诸禅客，莫把袈裟换羽毛。

#### 送东林院主归华亭

参禅人须猛烈，吹毛剑白雪雪。  
佛来与祖来，拈起当头截。  
云中木马惊嘶，山上鲤鱼出血。  
万仞崖头奏凯归，等闲踏破华亭月。

#### 送庆侍者回里省师

汝师年老中山寺，朝暮无人可瞻侍。  
不归扫洒执巾瓶，师资礼法合也未。  
汝母兼又年纪高，除汝一人更无二。  
望断秋风未见归，倚门日日长垂泪。  
离师弃母入山来，所图毕竟成何事。  
安贫乐道固所难，住个茅庵岂容易。  
也要种竹栽松，也要锄山掘地。  
也要运水搬柴，也要浇蔬灌芋。  
也要行道讽经，也要摄心除睡。  
藜羹黍饭塞饥疮，淡齏薄粥通肠胃。  
人生皆为口体忙，我亦未免形骸累。  
自家心地如未明，业识茫茫无本据。  
水边林下暂经过，吾汝皆非久居计。  
月江和尚有书来，勉汝归来有深意。  
开缄未读便抽身，不负来音全孝义。  
有言孝为百行先，在俗在僧谁不然。  
侍师奉母名敬田。何须入众并参禅。  
忽然思静又嫌喧，短策不妨闲往还。

#### 海都寺求语

急急做工夫，单提狗子无。脊梁高竖起，屹似须弥庐。  
翻来覆去看，要了叱公案。瞥然妄念生，便逐他使唤。  
精进不懈怠，坐立道可待。懒惰又昏沉，驴年也未在。  
若也放得下，无可无不可。千万百葛藤，尽是敲门砖。

#### 留进庵主

丹阳进禅人，随我住有日。虽立志参禅，未曾有所入。  
庵中诸事务，浑不惮劳役。口体甘淡薄，身心颇真实。

一朝拜我前，请语为法则。我写此数言，助汝进道力。  
只就我山居，随缘度朝夕。莫学野盘僧，东西与南北。  
寻常动用中，精进莫放逸。剔起眉毛看，毕竟是何物。  
看破看的人，大事方了毕。

### 示居士刘铁壁

见性成佛无别佛，古人说话最条直。  
当头坐断没纤毫，切忌随他言语觅。  
纵饶虚妄百千般，究竟还归一真实。  
老僧吐露真实情，寄与云间刘铁壁。

### 山中四威仪

山中行，信步慢腾腾。攀萝去，又上一峻嶒。  
山中住，几度朝还暮。手栽松，阴凉成大树。  
山中坐，飘飘黄叶坠。没人来，闭门烧焰火。  
山中卧。松风穿耳过。没来由，好梦都吹破。

### 重崖之下十首

1

重崖之下，火种刀耕。有粟有蔬，可煮可烹。  
了我目前，乐我余生。坐看庭柯，几度衰荣。

2

重崖之下，希古为俦。彻证本根，一了便休。  
纷纷玄徒，念死话头。待兔守株，求剑刻舟。

3

重崖之下，草莽日交。人影不来，黄叶飘飘。  
谷鸟晚啼，山月夜高。松露鹤飞，湿我禅袍。

4

重崖之下，蛇虎为邻。我心即忘，彼性亦驯。  
人生在世，各具天真。含齿戴发，胡为不仁。

5

重崖之下，未透本根。触境逢缘，扰扰纷纷。  
应须悟理，超越见闻。久久自然，左右逢源。

6

重崖之下，静默自居。三际不来，心如镜如。



斜月半窗，残火一炉。嗟彼睡夫，蝶梦蘧蘧。

7

重崖之下，幡然一叟。褰兮无边，胯兮无口。  
夜入禅那，昼勤垅亩。道在其中，别更何有。

8

重崖之下，目对千山。一根返源，六处皆闲。  
白云飘飘，绿水潺潺。动静自忘，别是人间。

9

重崖之下，不条形骸。木食草衣。布袜笋鞋。  
竹密暗窗，苔深覆阶。萧焉忘情，寂尔虚怀。

10

重崖之下，饱饭熟眠。纵情放逸，岁月虚延。  
老病时临，众苦交煎。临渴掘井，热闷徒然。

### 次韵送智西堂归灵隐

一榻平分鉴古轩，炉熏相对坐忘眠。  
山林礼乐无今昔，时节因缘有变迁。  
树影高低深夜月，猿声长短五更天。  
两冬不得梅花信，又约梅花到冷泉。

### 会赵初心提举

老来脚力不胜鞋，竹杖扶行步落花。  
待月伴云眠藓石，寻梅陪客过邻家。  
粥香瓦钵山田米，雪泛瓷瓿水磨茶。  
今日为翁时煮出，此心长只在烟霞。

### 别南山经室

屋借云边两载居，晴原无事便携锄。  
和香采得邻家菊，趁嫩挑来自种蔬。  
秋殿寂时山磬歇，夜窗虚处柏烟疏。  
明朝又向他山去，何日重来读梵书。

### 秋日秦川道中

处处西风叶落频，偶归湖寺甃容身。  
故人十有几人存，世事万无一事真。  
扰扰劳生同作梦，明明果报各由因。  
余谙此理能消遣，终不随他自损神。

### 偶作

今年七十七颓龄，血气潜消老病增。  
踏雪探梅知履重，挑云过岭觉肩疼。  
光阴别去忙如箭，世念消来冷似冰。  
却忆向时游岳洞，两三个上最高层。

### 冬至

昨宵冬至一阳生，万物欣欣尽向荣。  
铁树花开红朵朵，石田笋出绿茎茎。  
人间化日才添线，竹外幽禽便转声。  
白发老僧窗下坐，炉香多诵两行经。

### 却南州提举再招

自嗟业系在娑婆，一度寻思一叹嗟。  
世上多逢人面虎，山中少见佛心蛇。  
御寒补衲裁荷叶，遣睡煎茶煮瀑花。  
老拙背时酬应懒，不能从命出烟霞。

### 雪中示徒

六出飘飘入夜多，洒窗相似扑灯蛾。  
山家富贵银千树，渔父风流玉一蓑。  
深径绝无樵子语，阴崖却有猎人过。  
庵前黄独无寻处，唯见寒梅数朵花。

### 送皋侍者

侍者参得禅了也，万两黄金也合消。  
世上岂无千里马，人间难得九方皋。

### 送漆匠

里面尽情灰得了，外头方始好揩磨。  
虽然本有灵光在，也要工夫发用他。

#### 送真藏主礼育王

雁荡天台华顶峰，贸山乳宝接天童。  
遍游原不离双足，尽在摩尼一点中。

#### 送就禅人礼祖

人人有具黄金骨，何必诸方礼塔头。  
堪笑丹阳就禅者，春深换自浙东游。

#### 送松江深上人

参方礼祖外边事，一著工夫在己躬。  
亲觐阿师秋已半，树凋叶落露金风。

#### 送椿上人礼普陀

寒潮日夜吼雷音，耳听何如眼听亲。  
小白华严观自在，频伽声里现全身。

#### 示禅上人

古今无法可传流，只要偷心死便休。  
大抵是他人自肯，福源不会按牛头。

#### 送雪峰维那

留香堂里十声佛，惊倒江西马簸箕。  
八十四人扶不起，维那归去莫教迟。

#### 送人游五台

去去亳州最上层，文殊合掌笑相迎。  
岩前有个金狮子，颠倒骑归与老僧。

#### 送针工

手携刀尺走诸方，线去针来日日忙。  
量划别人长与短，自家长短几曾量。

### 示真副寺坐圆觉期

百日期中痛著鞭，工夫到处话头圆。  
多生业障俱消灭，佛境分明在目前。

### 送实监寺回大觉

杨岐骨格气雄雄，一夏相忘寂寞中。  
秋至思归天目去，竹房闲掩听松风。

### 愆上人回乡

孤身行脚缘何事，策杖归乡有底忙。  
白业不修禅不会，可怜空过好时光。

### 送德都寺回里

德云不在妙峰顶，却向别山相见来。  
从此罢休行脚念，坐看心地觉花开。

### 送真侍者

几年入众为参禅，三唤机缘未倒边。  
再去诸方重请益，却来这里吃粗拳。

### 送福上人礼祖

祖师塔是鹞仑砖，只在山边与水边。  
一一从头巡踪遍，草鞋依旧自还钱。

### 示来上人

看水看山何日了，奔南走北几时休。  
可怜身在袈裟下，道业未成先白头。

### 送净发待诏二首

1

结缘待诏到山中，廊下诸僧尽整容。  
方丈老人何不剃，要留白发过隆冬。

2

剃了又长长又剃，一年几度远烦过。  
大夫只管来求福，我福如何有许多。

### 送圆上人

妙净圆明全体现，不须来问我如何。  
正因行脚禅和子，知解何曾有许多。

### 送问上人归大乘

一句明明向汝道，冷如猛火热如冰。  
上人若不信我说，急急回归问大乘。

### 送人之五台

短策轻包上五台，银楼金阁正门开。  
文殊相见吃茶了，收取玻璃盏子来。

### 送门上人

夏在大乘堂里住，冬初来扣福源门。  
莫嫌老我无言说，一曲渔歌隔岸闻。

### 送明道者

工夫不到不方圆，心若坚时石也穿。  
不见头陀老迦叶，意根灭尽领金襴。

### 送大维那省母

桶箍爆处见根源，熟路重行三月天。  
日暖北堂萱草绿，对娘莫说老婆禅。

### 示茂道者

作佛生天容易事，最艰难是做头陀。

劳形枯骨安闲少，运水搬柴普请多。

### 示道人

自远相寻到鹅湖，殷勤请问做工夫。  
老僧真实为人说，出处伽陀一字无。

### 送勤上人

勤求警策做工夫，散乱昏沉尽扫除。  
后夜黑云消散尽，长天如水月轮孤。

### 示禅人二首

1

终日骑牛不识牛，何须辛苦外边求。  
只消蓦鼻牵来看，便是寻常这一头。

2

参得赵州无字透，玄关金锁尽开通。  
三更月下泥牛吼，八面玲珑海日红。

### 英上人求语

客冒春寒访隐扃，衲衣犹缀雪花轻。  
坐来出示诸方语，锦轴未开先眼明。

### 送维那之江西

上人壮志出丛林，一寸光阴一寸金。  
莫把世间闲学解，等闲埋没祖师心。

### 送凌侍者回净慈

十里湖光浸六桥，到时须著眼头高。  
断堤风暖杨花落，不是鸟窝吹布毛。

### 送观侍者

放下身心返自观，略无毫发许相瞒。  
云收雾卷乾坤阔，月上青山玉一团。

### 示勤道者

一片荒田一把锄，翻来覆去用工夫。  
一锄翻得春风转，也有瓜茄也有瓠。

### 示众

念未生时犹妄觉，瞥兴一念便伤他。  
工夫到此切须记，枯木岩前磋路多。

### 示道者

行尽东西南北州，如今能得此心休。  
俱胝只在山中住，受用天龙一指头。

### 跋净首座血书法华报亲

父是谁兮母是谁，胸中五逆是男儿。  
看他义断情忘处，菡萏花开三四枝。

### 常侍者血书金刚经

此经在处皆有佛，不劳心力更施功。  
祇园秋晚霜花重，树叶红于血染浓。

### 寄魁书记

僧住城隍佛祖诃，先贤多是隐岩阿。  
山泉流出人间去，清水自然成浊波。

### 寄静慈平山和尚

年老心孤忆弟兄，中峰且喜过南屏。  
潺潺一派双溪水，流入西湖更好听。  
领破蹄穿五百牛，南屏寺里一栏收。  
皮毛换得光生也，拽耙拖犁再起头。

### 寄友二首

1

山舍无聊夜卧迟，因君记得去年时。  
豆花棚下曾分榻，月落松梢尚诗咏。

2

万松影里三间屋，枯木岩前一个僧。  
三二十年如此过，肯将清淡换虚名。

#### 赠古樵

空劫以前无影树，撑天拄地赤条条。  
新州有个卖柴汉，收拾将来一担挑。

#### 赠无岸

举头四望白茫茫，南北东西竟莫知。  
不用篙篙撑到底，回头便是上船时。

#### 赠本源

滔滔心地中流出，低下随宜不自高。  
坎止流行皆末事，终归大海作波涛。

#### 赠石崖

千寻拔地青如玉，万丈凌云硬似刚。  
望见险峻多退步，有谁撒手肯承当。

#### 赠无敌

眼空湖海气凌云，杰出丛林思不群。  
古往今来谁是我，得饶人处且饶人。

#### 赠白庵

一色虚明含法界，四檐皎洁若冰霜。  
小窗几度雪晴夜，不见梅花只觉香。

#### 赠别润

湛然不入众流数，瞪目观来果必殊。  
但得煮茶增味好，谁能泛滥落江湖。

#### 赠别峰

峭峻万峰齐不得，孤危众岳势难同。



善财参见得去处，又在那边苍翠中。

### 真赞出山佛二首

1

头发髻松下翠微，冻云残雪缀伽梨。  
不须更问山中事，观著容颜便得知。

2

肘破衣穿骨裹皮，下山回首步迟迟。  
父王休遣人来问，颜貌不如宫里时。

### 观音大士二首

1

童子南询尚未回，白华岩下望多时。  
长天万里无云夜，月在波心说向谁。

2

水即是波，岩即是石。  
坐证圆通，斯为第一。

### 罗汉二首

1

一切不为，长年打坐。  
执法修行，如牛拽磨。  
寂灭现前不见前，  
待出定来重勘过。

2

一个浑身，一瓶秋水。  
物外生涯，只这便是。  
白眼看他世上人，  
手捺双趺笑而已。

### 达摩二首

1

面黑齿缺，心粗胆大。  
梁王殿上，撒沙抛土。  
少室峰前，开花结果。  
槲叶岩台，蒙头宴坐。  
夫是谓之菩提达摩。

2

一言不契渡江淮，熊耳峰前去活埋。  
无限家私狼藉尽，何争一只破皮鞋。

### 赞及庵和尚并师同帧

二老比丘，有何因由。先觉后觉，东州西州。建阳山中相见时，好于骨肉；西峰寺里再参后，恶似冤仇。从此父南子北，不知云散水流。在你也报尽已归兜率，在我也业烦尚寄阎浮。是非恩怨难分处，一片松荫盖石头。

### 自赞

板齿生毛，面孔无肉。受灵山记，欠人天福。瘦棱棱，却如碧海波心涌起一座玉岩；硬剥剥，好似白云堆里突出千寻石屋。道是天湖庵主，不是我同流。谓是福源住持，亦非吾眷属。眼里无筋底，未免向影子上胡猜乱猜；皮下有血底，终不向丹青上东卜西卜。咦，切须莫展与人看，挂向闲房伴松竹。

### 禅人求赞

发白面皱，皮黄骨瘦。用尽自己心，笑破他人口。情知衰世道难行，却来静处闲叉手。看天湖鹅湖二水同流，对霞峰胥峰两山并秀。何缘得此优游，端的自能跳透。不是禅翁自点胸，古今尽道苏州有。

### 辞世偈

青山不著臭尸骸，死了何须掘土埋。  
顾我也无三昧火，光前绝后一堆柴。